

Cunter il chasti per esser maridà

Ils uestggs sustegnan la pcd

■ **(anr) Quai na datti betg uschè savens: Ch'ìls uestggs sustegnan la Partida cristiandemocratica (pcd). Adina na pon els era betg far quai. Ma questa giada èsi il cas.** Ils 28 da favrer vegn era votà davart l'iniziativa da la pcd svizra cunter il chasti per esser maridà. La baselgia catolica metta gronda paisa sin la famiglia. Perquai s'interesseschia ella era da l'iniziativa «Per lètg e famiglia – cunter il chasti per esser maridà». Ils uestggs èn fitg satisfatgs ch'ins saja encunter da discriminar la lètg pertutgant taglia e rentas. Il medem mument s'engaschia la pcd era per francar en la Constituziun federala ina definiziun da la lètg. Tenor quella è la lètg ina cuminanza durabla e reglada tranter um e dunna.

Quai che na plascha als adversaris chatta il sustegn dals uestggs. La definiziun da la lètg – sco ella è proponida da la pcd – s'accordia era cun la definiziun religiosa da la lètg che saja sco sacrament ina realitad natirala ed ina cuminanza per la vita tranter um e dunna che pussibileschia da fundar ina famiglia.

Il president da la Conferenza episcopala svizra, uestg *Charles Morerod*, ha rendì attent a papa *Francescg* che haja taxa en sia allocuziun per la fin da la Sineda episcopala da vesair en la lètg e famiglia la basa da la societad e da la vita umana.

Pèrs maridads e tals en partenadi registrà vegnian dischavantagiads visavi pèrs en concubinat tar las taglias e segirdas socialas. Quai è – tenor la pcd – malgist. Tar las medemas entradas e facultads pajan pèrs maridads dapli taglia e survegnan damain renta. Cun l'iniziativa da la pcd vulan ins finalmain abolir questa discriminaziun.

Tenor il comité contra intendia l'iniziativa – tras sia definiziun explicita – in scumond durabel da lètg per partenaris omosexuals e bisexuals da medema schlattaina. Era manchian quattras blers daners da taglia. Tar ils adversaris s'audian la Partida liberala, socialdemocratica, verda e verd-liberala sco era las organisaziuns da lesbas ed omosexuals. L'Unniun evangelica svizra ha dà libra la vusch.